

17 April 2020

OMSENDBRIEF 4/ 2020

AAN ALLE VROUDELIDMATE

Liewe NHSV Dames

Die NHSV Dagbestuur hoop dat dit met elkeen van julle goed gaan in hierdie uitsonderlike omstandighede waarin ons ons bevind in 2020! Die wêreldwye Covid-19-pandemie stel ons daagliks voor nuwe uitdagings in ons persoonlike lewe, sowel as ten opsigte van ons werksaamhede binne die NHSV en die Kerk.

1. 49ste NASIONALE KONGRES

Die NHSV se 49ste Nasionale Kongres wat van 14 tot 16 Junie 2020 sou plaasvind, word uitgestel na 2021. Die enigste ander datum wat beskikbaar sou wees vir hierdie jaar is van 24 tot 26 September 2020 in die skoolvakansie.

- Weens die verlenging van die grendeltyd met twee weke tot 30 April 2020, is die Covid-19-virus se verwagte piektyd uitgeskuif na Augustus/September 2020, terwyl dit oorspronklik verwag is vir Junie/Julie 2020. Wanneer die grendeltyd opgehef word, gaan ons daaglikse lewe nie oornag na normaal toe terugkeer nie, met beperkings wat oral steeds sal geld vir groepe wat bymekaar mag kom vir 'n byeenkoms soos 'n erediens, kongres, ensovoorts. Die grendeltyd kan ook verleng word, wat ons omstandighede vir die jaar vorentoe baie onseker maak in terme van beplanning.
- Skool- en universiteitsvakansies vir 2020 gaan gewysig word om die agterstallige dae in te haal soos nodig. Dit kan beteken dat die Junie/Julie- en Septembervakansie gaan wegval of verkort kan word. Ons wag nog vir inligting in hierdie verband.
- Die pandemie het huisgesinne, gemeentes en besighede finansiëel in 'n krisis gedompel, en ons moet in hierdie moeilike tye oorleef met beperkte finansies en die middele tot ons beskikking.
- Ringsvergaderings en fondsinsamelingsfunksies in gemeentes gaan uitgeskuif word na datums later in die jaar, wat beplanning rondom die Nasionale Kongres ook sal bemoeilik vir September 2020.
- Die insette en beplanning wat gepaardgaan met die NHSV se Nasionale Kongres is sodanig dat die bywoningsgetalle dit moet regverdig ten opsigte van die fasiliteite, kunstenaars, sprekers en uitstallers wat spesiaal daarvoor genader word.

Na deeglike oorweging van al die huidige inligting tot ons beskikking, het die NHSV Dagbestuur besluit om die Nasionale Kongres te verskuif na 'n datum in 2021. Sodra ons weer in die nabye toekoms na die *nuwe normale lewe* terugkeer, sal ons weer oor al die feite besin en 'n nuwe datum vir 2021 vasstel.

2. TEMA 2020

Ons tema vir 2020 – Lééf die liefde: *Laat julle lig so voor die mense skyn...* (Matt 5: 16)
– gaan die tema wees vir 2020 én 2021.

Met hierdie tema in gedagte, gaan ons fokus vir 2020 ingestel wees op persoonlike geestesgesondheid en welstand. Die NHSV Dagbestuur het pas in *Vroueflitse* se Herfs-uitgawe begin met 'n nuwe reeks artikels met die klem op persoonlike geestesgesondheid. Gaan lees gerus die NHSV se *Vroueflitse* en *Die Christelike Vrou* aanlyn op ons webblad <https://nhsv.org.za/publikasies/>.

Om sy kop op te lig en na die son toe te draai, is 'n besluit wat 'n sonneblom elke dag maak... Jou fisiese en geestesgesondheid is belangrik, sodat jy vir ander om jou 'n inspirasie en voorbeeld kan wees. Jy moet juis in hierdie tyd na jouself kyk, want ander mense het jou ook nodig, veral in hierdie tyd!

3. NHSV KANTOOR

Die NHSV se kantoorpersoneel werk tydens die inperking van die huis af, en enige navrae kan telefonies by 012 325 0117 of per e-pos gerig word aan Rozelda Nel by admin@nhsv.org.za. Die NHSV Dagbestuur en streekverteenvoerders is ook in hierdie tyd telefonies of per WhatsApp beskikbaar.

Met ons hande styf in God se hande, mag ons mekaar se hande vat in 2020 vir ondersteuning aan mekaar, om te verseker dat ons emosioneel en geestelik sterker sal wees as voorheen. Omring jouself daaglik met positiewe en opbouwende gedagtes en geselskap, met die oog altyd gevestig op Jesus, ons Leidsman en Verlosser.

Lééf die liefde en wees so die lig op jou naaste se pad – in die proses verlig jy ook jou eie pad!

NHSV groete

(get) **Mari-lizé Beukes**
Voorsitter
NHSV Hoofbestuur

